



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

**Periodu: Setembru 2011**

**Edisaun: 07 Setembru 2011**

**Parlamentu Nasionál ratifika nomeasaun Prezidénte Tribunál Rekursu**

Iha loron 29 Agostu 2011, Parlamentu Nasionál, aprova Projeitu Rezolusaun número 74/II ne'ebé apresenta husi Vice Prezidénte Parlamentu Nasionál, Vicente Guterres hodi ratifika nomeasaun Prezidénte Tribunál Rekursu Dr. Cláudio Ximenes de Jesús tuir dezpaixu Prezidénte da Repúblika Dr. José Ramos Horta número 43/2011 de 10 de Juñu 2011.

Diretór JSMP Luis Oliveira Sampaio hateten *aprovasaun ba retifikasaun ne'e importante hodi kumpri Artigu 95<sup>o</sup> (3) letra (a) Konstituisaun RDTL no no Artigu 164<sup>o</sup> alinea (2) ne'ebé atribui kompetensia ba Parlamentu Nasionál hodi retifika nomeasaun ba Prezidénte Tribunál Rekursu.*

Mesmu nune'é, tuir observaun JSMP nian nota katak prosesu ne'e komplikadu uit-oan, basé desintendimentu balun konabá prosesu retifikasaun husi Parlamentu Nasionál relaciona prosesu ne'e. Deputadu balun preokupa ka hatudu reazem tanbá prosesu retifikasaun ne'e apresenta Parlamentu Nasionál bainhira Prezidénte da Repúblika Dr. Ramos Horta halo tiha ona renomeasaun ba Dr. Cláudio Ximenes de Jesús nu'udar Prezidénte Tribunál Rekursu ba mandatu tinan hat husi 2011 to'o 2015, iha fulan Juñu 2011 liu husi Dekretu Lei Número 43/2011 de 10 de Juñu 2011. Tanbá tuir deputadu balun husi bankada AMP hanesan PD no CNRT nomós partidu opozisaun argumenta katak dekretu lei ne'e deskuti antes. JSMP mós observa katak, membrus parlamentár balun tantu husi AMP no Fretilin kestiona maka'as ba proposta rezolusaun ne'e entermus sentidu jurídiku tanbá dekretu lei ba nomeasaun ne'e públika tiha ona iha Journál da Repúblika no Dr. Cláudio Ximenes de Jesús rasik hala'ó tiha ona kna'ar hanesan atuál Prezidénte da Tribunál Rekursu ba mandatu foun.

Tanbá ne'e, membrus parlamentár hirak ne'e sujere atu kansela tiha aprovasaun ba retifikasaun ne'e, hodi sira la sai fali karimbu ba kosmetika polítika Prezidénte da Repúblika nian.

Hatan ba reasaun no preokupasaun hirak ne'e, proponentes ba lei ne'e, ne'ebé nu'udar Vice Prezidénte Parlamentu Nasionál, Sr. Vicente Guterres argumenta katak, aprovasaun ba

rezolusaun ne'e importante tanbá sai hanesan responsabilidade konstitusionál Parlamentu Nasionál atu retifika mandatu Prezidente Tribunál Rekursu hodi reforsa ho dekretu Lei Prezidente da Repúblika.

Deputadu Vicente Guterres mós iha nia proposta deklarata katak aprovasaun ne'e mós hanesan formálmente deit atu kumpri sira nia obrigasaun antes remata sira nia mandatu ba segundu lejislatura, tanbá nomeasaun dala hira ona ba Dr. Cláudio Ximenes de Jesús nunca hetan retifikasaun husi Parlamentu Nasionál.

Deputadu Vicente mós kontinua argumentu katak dekretu lei ne'e konabá nomeasaun ba Prezidente Tribunál Rekursu, públikadu ona iha Journál da Repúblika ba mandatu tinan hat, tuir termus ne'ebé previstu iha artigu 86<sup>o</sup> alinea j), número 2) artigu 124<sup>o</sup> no número 2) husi Konstituisaun RDTL. Tanbá ne'e, nia husu ba membrus Parlamentár sira atu tetu didiak sira nia desizaun atu kansela rezolusaun ne'e hodi harê hikas fali kritéria rekrutamentu ba Prezidente Tribunál Rekursu ne'ebé defisil atu buka ema seluk, aliende Dr. Cláudio Ximenes de Jesús.

Reálmente JSMP konsidera katak entermus hierárkika ba orgaun soberanu no prosedimentu legál ne'ebé bai-bain aplika iha Parlamentu Nasionál konabá aprovasaun ba lei ka dekretu lei ruma, Parlamentu nunca bele aprova dekretu ka kualker rezolusaun ruma ne'ebé pública tiha ona iha Journál da Repúblika ne'ebé termina validade ba kualker dokumentus estadu.

Mesmu hanesan ne'e, bainhira JSMP tenta atu harê hikas fali iha públikasaun Journál da Repúblika ba Dekretu Lei husi Prezidente da Repúblika iha website Journál da Repúblika nian, maibe JSMP mós la consegue dekabre ka hetan públikasaun ida konabá dekretu lei ba nomeasaun ba Prezidente Tribunál Rekursu, hanesan proponente haktuir ona ba audiénsia tomak iha Parlamentu Nasionál.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883/7295795